

Rapport dalla sessiun dil cussegl da vischnaunca dils 20-01-2014

Tractanda 1

Approbaziun dil protocol dalla sessiun dils 16-12-2013

Il protocol dalla sessiun dils 16-12-2013 vegn approbaus en votaziun unanima cun engraziament.

Tractanda 2

Nominaziun dil cussegl d'administraziun per la societad acziunara Campadi Trun SA

Il 20 d'october 2013 ha il pievel approbau il credit per il niev Campadi Ognà. Suenter ha il cussegl da vischnaunca elegiu il 18 da november 2013 ils commembers dalla cumissiun da baghegiar.

Sco proxim pass nominescha il cussegl communal oz il cussegl d'administraziun per la societad acziunara Campadi Trun SA. Al cussegl d'administraziun fan 5 persunas part. 4 dils commembers vegnan elegi dalla vischnaunca, il 5-avel commember vegn elegiu da Trun Turissem.

La suprastanza communal ei sestentada d'anflar ina persuna qualificada che sa tgamunar il cussegl d'administraziun. Igl ei reussiu d'anflar en la persuna da Hansueli Baier, Cuera, ina persuna cun bunas enconuschientschas dall'economia sco era dil turissem e cun experientschas fatgas sco commember da cussegls d'administraziun.

Davart ils ulterius posts propona la suprastanza communal d'eleger Donat Nay sco representant dalla suprastanza communal e Flurin Maissen, ina persuna engaschada e qualificada enteifer la vischnaunca da Trun. Ord il miez dil cussegl da vischnaunca vegn plinavon fatg la proposta d'eleger sco quarta persuna Gion Simeon en il cussegl d'administraziun.

Il cussegl da vischnaunca nominescha cun 10:0 vuschs ed ina abstenziun suandontas persunas per il cussegl d'administraziun dalla societad acziunara Campadi Trun SA:

- **Hansueli Baier**
- **Donat Nay**
- **Flurin Maissen**
- **Gion Simeon**

Tractanda 3

Informaziun davart il project via da Munt

Il cussegl da vischnaunca vegn informaus da gerau Dumeni Tomaschett e dil sevicultur Mattias Cadruvi davart il project via da Munt.

La via Munt ei vegnida construida ils onns 1957-1960 ed ha actualmein ina ladezia da 2.0 – 2.20 meters. La via ei memia stretga per carrar cun maschinas forestalas ed agricolas e duei vegnir rinforzada e slargada cun il niev project. Il slargament dalla via da Munt ei cunzun necessaris per il forestalessen e per l'agricultura, per la sigertad e per igl access tier ils cuolms.

Il project duei vegnir realisau duront ils onns 2014 – 2022 respectivamein 2015 – 2023 e cuosta totalmein frs. 6'000'000.-. Il cantun ha mess en vesta contribuziuns ell'altezia da 77%. Per la vischnaunca restan aschia cuosts da rodund frs. 1.4 milliuns che serepartan sin ils 8 onns da construcziun.

Suenter l'elaboraziun dil preproject vegn il project publica e sutta mess allas instanzas politicas dalla vischnaunca per l'approbaziun dil credit. L'approbaziun e decisiun definitiva entras la Regenza dil cantun Grischun suonda suenter ina decisiun positiva dalla vischnaunca.

Tractanda 4

Pusseivladad da tschentar damondas

Dalla pusseivladad da tschentar damondas vegn fatg diever.

Per il cussegl da vischnaunca

Il president
Rico Schwarz

L'actura
Sandra Gautschi